

DISSERTATIO INAUGURALIS MEDICA,  
DE

# ATROPHIA INFANTUM,

*Quam,*

AUSPICE DEO PROPITIO,

*Et Consensu atque Auctoritate Gratosæ Facultatis Medicæ,*

IN ALMA REGIA FRIDERICIANA,

P R Æ S I D E

DN. D. MICHAELE ALBERTI,

SACR. MAJ. REG. BORUSS. AULICO ET CONSIST. MAGDEB. CON-

SILIARIO, MED. ET PHILOS. NATUR. PROFESSORE PUBL. ORDIN. ACAD.

NAT. CUR. COLLEGA, SOCIET. REG. BORUSS. SCIENT. SODALI, ETC.

DN. DECANO SUO SPECTATISSIMO,

*Domino Patrono, Præceptore ac Promotore suo omni honoris cultu prosequendo,*

PRO GRADU DOCTORIS,

SUMMISQUE IN MEDICINA HONORIBUS ET PRIVILE-

GIIS DOCTORALIBUS LEGITIME IMPETRANDIS,

HORIS LOCOQUE CONSVETIS,

ANNO MDCCXXIX. D. MART.

*Publicæ ac placidæ eruditorum ventilationi subjeciet*

AUCTOR RESPONDENS

JOANNES FRIDERICUS BOELI,

BERTCKOWIO - PALÆO - MARCHICUS.

---

HALÆ MAGDEBURGICÆ,

TYPIS JOH. CHRISTIANI HENDELII, ACAD. TYPOGR.









## PRÆLOQUIUM.



Infantibus mederi arduum esse *Epiphanius Ferdinandus* aliique in arte salutari doctissimi atque exercitatissimi viri satis luculenter demonstrarunt & quidem eam potissimum ob rationem, quoniam infantes non modo ob loquelæ defectum mali sui conditionem atque magnitudinem neque medico, neque adstantibus indicare atque declarare valent, verum & plurimi a remediorum usu abhorrent, canequē pejus & angue illa fugiunt. Quam ob rem multi famigeratissimi medici uti *B. Wedelius, Schelhammerus, Stablius* aliique peculiariter scripta de morbis infantum publici juris fecerunt posteritatiq̃ donarunt, in quibus docuere, quomodo mala infantilia ex signis agnosci, qua cautione præcaveri, & denique qua methodo atque arte, quibusque præsidiis debellari at-



que removeri possint atque debeant, ast vero viri hi celeberrimi brevitati dum operam dederunt, non omnia proferre atque litteris consignare proposuerunt, sed varia posteritati in calamitatibus infantum observanda atque annotanda reliquerunt. Quæ cum ita sint, quum ab *Illustri Medicorum in celebri hac-  
se Academia Fridericiana Ordine* benignissime mihi sit demandatum *disputatione quadam inaugurali* profectus meos in arte salutari publice demonstrare, ipse mihi morbum quendam in nostris regionibus admodum grassantem, multosque tenellulos vita privantem, qui sub nomine ATROPHIÆ INFANTUM venit, pertractandum atque explicandum, quantum vires debiles concedent, sumsi. Cui conatui *Altissimum Numen* ut divina sua clementia atque gratia, uti hucusque studiis meis adfuit, jam quoque adsit, humillimis, demississimis atque ardentissimis efflagito atque ambio precibus.

§. I.

**P**Lurimi medici dissertationes scribentes verba tituli explicare atque vocum etymon significare solent, cui mori ut ego quoque satisfaciam, statim in limine dissertationis pauca de hocce monere animo statutum atque deliberatum habeo. Quilibet vel leviter linguae græcæ cognitione imbutus, facile videre poterit, nomen *Atrophiae* conflatum esse ex *ἀ* *privativo* & *τροφή* *nutritio*, sicque nihil aliud nomine hocce intelligi posse, quam *privatio nutritionis*. Quum vero in scholis medicis vocabulum *Atrophia* in admodum lato sumatur sensu, ita ut etiam

iam



iam adultæ ætati competat, & illi qui læsionem cujusdam visceris notabilem in suo corpore foveant, verbi gratia infarctum vel scirrhum vel etiam exulcerationem hepatis, lienis, pulmonum, renum, imo ipsarum glandularum mesaraicarum, aut qui scorbuto, lue venerea aliisque morbis, nutrimentum corpori defraudantibus, laborant, *Atrophia* affligi dicuntur; pernecessarium & utile esse duxi vocabulum *Infantum* adjicere, hocque cuilibet indicare atque declarare, mihi animum esse saltem illam Atrophiam, quæ ætati infantili admodum frequens, & apud nos morbus sporadicus existit, quamque in sequentibus fusius atque luculentius describam, in præsentī dissertatione pertractare. Restat autem *Lectori Benevolo* adhuc scrupulum quendam ex animo ejicere, qui me vitii ac nævi cujusdam merito accusare posset, quando in sequentibus quoque de *Atrophia puerorum* verba facio, quapropter heic indico, me sub ætate infantili quoque intelligere puerilem, licet probe sciam, *Latinos nomen infantis* derivare ab *in* & *fari* & sub hocce nomine eos intelligere, qui fari sunt inepti, qui suas cogitationes cum aliis communicare nequeunt, sed quoniam plurimi celebratissimi medicī & ii qui libros integros de morbis infantum scripsere, & illi, qui saltem dissertationes exaravere, sub nomine *Atrophie* infantum quoque puerilem pertractare solent, ego hac in re nil immutare, sed vestigia ipsorum premere & dissertationi meæ titulum *Atrophie infantum* imponere volui.

§. II.

Hæcce *Atrophia* in germanica lingua vocatur das verzehrende Wesen, das Abnehmen der Kinder, die Dürre, die Behrsucht & in nonnullis Teutoniæ locis das Rücklein dicitur.



tur. Mulieres medicinam mentientes, sed non recte intelligentes, quæ a vulgo ut plurimum doctorissarum titulo atque nomine ornantur ac nobilitantur, quamprimum infantem macilentum aspiciunt, plenis buccis evocant *das Kind habe die Witeßer*: attamen harum vetularum pathologiæ fucatæ, absurdæ atque fictitiæ non semper est adhibenda fides, neque earum experientiæ superstitiosæ facile dandus est locus. Nonnulli tamen extiterunt medici infimæ haud fortis, qui novum hocce inventum, non solum approbarunt, verum etiam novi morbi genere ornarunt, atque appellarunt hæc corpora, quæ in poris cutis inveniunt, quæque pro animalculis vivis venditant *Comedones, Crinones, Dracunculos*. *Comedones* quoniam infantes atque pueros necessario nutrimento privant: *Crinones*, qui crinium forma apparent: *Dracunculos* nomine horrifono, sed forma latente. Ast quid hacce de opinione sit sentiendum in sequentibus plura.

§. III.

*Atrophia infantum* est morbus, ubi tam partes internæ quam externæ debito ac necessario nutrimento destituuntur ob impeditum chyli ad Massam Sanguinis in haud sufficiente quantitate gressum, & sic successive contabescunt.

§. IV.

Differt *Atrophia* ab *Hæctica* in eo, quod in hocce morbo tabida corporis consumptio tantum constituat symptoma & ulcus aut Scirrhum & infarctum Lienis, Hepatis vel alius cujusdam partis pro causa agnoscat, in *Atrophia* vero strictè dicta non modo hæc non simili modo adsint, sed quoque extenuatio corporis non sit symptoma, sed ipse mor-



morbis & quidem idiopathicus. Differt quoque ab hectica ratione causarum, in atrophia enim infarctus tantum vel ad summum scirrhusitas glandularum mesaraicarum; in hectica autem plerumque exulceratio cum febre aliisque symptomatibus subest. Porro ratione ætatis differt, hectica enim vera potissimum illos, qui pubertatem jamjam sunt transgressi, hicce morbus vero infantes, pueros ac puellas præcipue affligit atque excruciat. Quomodo differat a *Phthisi* probe quoque est annotandum, hujus causa scilicet semper latet in pulmonibus, ubi vera exulceratio adesse debet cum tussi humida & exspuitione materiæ fetidæ purulentæ sanguinolentæ, ubi integræ vomicæ insimul interdum ejiciuntur, alias morbus pro vera phthisi non est declarandus, in Atrophia vero causa morbi latet in abdomine, ubi vel vermes vel ostiolorum vasorum lacteorum obstructio, vel glandularum mesaraicarum infarctus malum causantur. Ab *Aridura* partium noster affectus quam facillime distingui potest, in illa enim unum vel aliqua tantum membra verbi gratia pedes, brachia &c. necessario destituuntur nutrimento atque exarescunt, idque ut plurimum fit a Paralyfi, in hoc vero non solum partes externæ, sed etiam internæ, in summa totum corpus depascitur. Distinctio quoque quædam est admittenda inter *Atrophiam* atque *Maciem*, siquidem in macie pinguedo tantum absumitur, in atrophia vero partes quoque musculosæ contabescunt atque exarescunt. A *Tabes* etiam differt, in qua omnes quidem partes emaciantur, sed longe ex aliis causis quam in Atrophia, scilicet a digestionem depravatam, a diarrhœa nimis diu durante, vel a fluxu cœliaco, Lienteria, Scorbuto, Gonorrhœa inveterata & chronica, nec non Lue venerea. Tandem



dem etiam distinguitur a *Rhachitide* vulgo *der Englischen Kranchheit* non solum in eo, quod hæc in nostris regionibus plerumque sequatur *Atrophiam*, sed & quod in *Rhachitide* non solum corpus contabescat, verum & oculis sese fistant tumores & superadcretiones artuum vel incurvatio tibiarum, spinæ dorsi, gibbositas, coxarum excrescentiæ, quæ vero omnia in *Atrophia* non ordinarie reperiuntur.

§. V.

*Atrophiae* Infantum causam immediatam esse chylum in haud sufficiente quantitate ad Massam Sanguinis delatum jam in descriptione *Atrophiae* dixi. Ejus causæ vero sunt vel vermes in intestinis hærentes & debitum nutrimentum absumentes, vel obstructio ostiolorum vasorum lacteorum vel ipsarum glandularum mesaraicarum infarctus aut scirrhus, quarum peculiaris, si corpus tenelluli infestat, diversa introducit signa, ex quibus causa morbifica potest cognosci, una etiam ab altera ratione periculi, quod corpori infert, distinguitur, quare alia atque alia est formanda prognosis, tandem etiam cura non uno potest institui modo secundum *Empiricorum* perversum modum, sed quum morbos curare nil aliud sit, quam causas illorum extirpare, diversa quoque secundum varietatem causarum est instituenda methodus medendi, diversaque requiruntur remedia, de quo recte *Celsus* scribit *Lib. I. Præfat. p. m. 4.* *Neque enim credunt, qui rationalem medicinam profitentur posse cum scire, quomodo morbos curare conveniat, qui, unde hi sint, ignoret.* Et non solum causam immediatam hujusque proximas medicus scire debet, sed etiam omnes illæ, quæ hæc producere valent, quarum interdum multæ dantur, rationali medico haud debent esse incognitæ, quod serio



ferio inculcat sapiens artis nostræ parens, *Hippocrates de Arte XX. 4.* ubi dicit: *Eum recte esse curaturum, quem prima origo causæ non fefellerit.* Qua de re me recta ingressum esse via persuasus sum, si tres species Atrophiciæ constitutam & cujuslibet pathologiam, diagnosin, prognosin atque curationem in specie sum pertractaturus.

§. VI.

Initium itaque faciam ab illa Atrophia, quæ originem suam habet a vermibus in intestinis hærentibus, ipsiusque signa diagnostica sequentibus proponam. Conqueruntur tenelluli de variis abdominis doloribus spasticis & maxime morficantibus circa umbilici regionem, qui post pastum paululum remittunt, imo interdum intermittunt, quia vermes tunc temporis accipiunt nutrimentum, quamprimum vero hocce est consumtum, iterum incipiunt, tenellulorum intestina lancinare imo interdum corrodere, siquidem observatores multi in primis *Moroni* in *directorio medico pratico* testantur, lumbricos intestina corrodere & abdominis cavum ingressos, hocque modo dira, insolita & enormia symptomata induxisse, qualia sæpe a fascino oriri putantur. Experiuntur porro varia tormina tenesmoidea, ut sæpius desiderare cogantur, præsertim jejuno stomacho, quæ in primis sunt præsentia, quando ascarides in intestino recto hærent, sicque nuper habui in cura puellulam trium circiter annorum, quæ atrophia laborabat cum tenesmo perpetuo atque stimulo insigni ad urinam, ita ut etiam semper urina exstillaret, ubi post usum trium, ni fallor, granorum pulveris *Massæ Pilul. Confortantium Cl. Funckeri*, *Præceptoris mei honoratissimi*, ad modum *Beccherianarum* ex Aloe depurata, extractis amaris atque gummatibus resinosis



præparatarum, insignis ascaridum copia evacuabatur, quibus eliminatis statim stillicidium urinæ cessabat, & conamina tenesmoidea quoque non modo minuebantur, verum etiam paucis diebus post penitus filebant. Vexantur etiam crebrioribus vomendi conatibus, sub quibus copiosus liquor aquosus in os effunditur, id quod vulgus male sanum vocat *der Herk-Wurm* beseige sie. quo tunc temporis maxime affici solent, quando vermes nutrimento sunt destituti, quamprimum enim ægrotantibus cibis suppediatur, statim conatus vomendi imminuuntur, imo plane cessant. Hæc recensita symptomata exasperantur, quando ægrotantibus salina, amara, balsamica, acida & similia, quæ vermibus sunt inimica porriguntur, quæ vero mox sopiri ac demulceri possunt mellitis, saccharatis & lacticiniis, tamquam vermibus gratissimis. Quando ira commoventur statim pejus se habent, & morsificationes experiuntur, quia bilis in intestinum duodenum est infusa, quæ adversa est vermibus. Vid. *Dn. D. Præses, Præceptor ac Patronus meus omnihonoris atque observantiæ cultu æternum colendus, in Praxi Sect. VII. Cap. XV. de Vermibus P. V. pag. 646.* Quod vermes vero hæcce incommoda pariant, & bilis stimulando id non perficiat, ex eo probo, quia post assumptionem salium mediorum idem producit effectus, quæ tamen in parca dosi data morsificationes tales haud producant. Vid. *D. D. Præses in Therapia Medica Cap. XIII. de Anthelminthicis p. 142.* Appetitus porro est vagus plerumque nimius, interdum vero etiam prostratus, feruntur maxime in cibos siccos & potus frigidos, calida autem ut plurimum respuunt. Nares perpetua mucositate imo excoriatione affectæ sunt ob perpetuum



petuum pruritus, frictionem & scalptionem, quibus frequentissimæ sternutationes interdum junguntur. Color faciei ex livido est pallidus, qui autem interdum mutatur in rubrum. Livescentia albugineæ tunicæ & concavitas oculorum interdum affectum hunc quoque comitantur. Siticulositas ingens adest, præsertim tempore matutino, sæpius vero etiam noctu. Fætor oris & fæcum alvinarum est deterrimus & vix ferendus & alvus interdum laxa, ut plurimum vero obstructa. Urina est turbida, album repræsentans colorem. Noctudum dormiunt admodum sunt inquieti, crebris pavoribus concutiuntur, dentibus strident, quidam deliriis evigilant, alii convulsionibus epilepticis, vel plane singularibus symptomatibus afficiuntur, ut pro incantatis a non intelligentibus habeantur. Vermes vero talia mala producere posse sequentes docebunt casus. *Magnificus Dn. Pro-Rector, Hoffmannus, Patronus ac Præceptor meus summa animi reverentia ætatem mactandus*, aliquando in Collegio Pathologico-Præctico enarrabat casum satis notabilem, ubi honesta quædam scemina ex vicinia cum filio X. circiter annorum ad hancce pervenit urbem, qui miris motibus convulsivis quotidie circa vesperam est excruciat, ut etiam multi homines tum ex studiosis tum civibus curiositatis gratia huncce videndi advenerint, & iudicium tulerint, morbum esse ex fascino. Mater multos heic loci medicos in auxilium vocavit & ipsum *Magnif. Dn. Pro-Rectorem*, qui morbum ex verminibus oriri iudicavit, variaque adversus hos sunt ordinata remedia, sed sine omni effectu, donec tandem *Magnif. Vir* iussit, ut clyster applicetur ex lacte atque melle, post cuius usum multi vermes sunt excreti, & æger, eliminatis hisce



hostibus, pristinae est restitutus sanitati. Similem casum mihi enarravit *B. Stabel, Medic. Doctor & Civitatis hujus Physicus adjunctus* de puero, qui miris cruciatibus est vexatus, quorum causam calculum renalem esse alii medici dixerunt, & quoque per IV. annos remedia contra calculum dedere, sed sine effectu, donec tandem in consilium vocatus est *B. Stabel*, qui affirmavit morbum ex vermibus oriri, eumque in finem ipsi anthelminthica propinavit, post quorum usum lumbricus valde longus est excretus, & sic calculus fictus una vice expulsus, & puer a talibus motibus in totum est liberatus. Ego quoque hac in re experientia nuper sum edoctus, dum visitavi puerum XIV. annorum, cujus parentes auxilium sibi expetebant a *Clar. D. D. Funckero*, qui motibus convulsivis per aliquod temporis spatium valde vexatus erat. Ego, posteaquam circumstantias probe examinaram, causam morbi vermes esse adstantibus non solum indicabam, verum & *Cl. Funckero* referebam, qui praescribebat Essentiam quandam amaram anthelminthicam & pulverem purgantem, & post duos dies vermes erant enecati, aegerque cum pristina sanitate redibat in gratiam. Insuper venter in infantibus talibus est turgidus, artus autem tam superiores quam inferiores imo totum corpus extenuantur, ut macie quasi pelluceant & ariditate crepent infantes, tempora enim collabuntur, costae protuberant, scapulae alarum instar prominent, accedente ut plurimum febre lenta, quae omnia maxime circa novilunium & plenilunium exasperantur. Dixi totum corpus extenuari, nam quando unum latus saltem afficitur, casus est rarissimus, qualem referunt *A. N. C. Dec. 2. an. 5. obs. 136.* ubi scribunt: *Puella VII. annorum, mercatoris filia, nunc ab*  
anno



*anno atrophica laborare cæpit, & quidem unius lateris scilicet sinistri, quod latus ab axillis usque ad calcem ita emaciatum est, ut nihil præter ossa & cutem appareat, altero latere bene & naturaliter se habente. Hæcce sunt signa ex quibus vel omnibus vel saltim plurimis conjunctim sumtis firmiter concludere licet, Atrophiam ex vermibus esse præsentem.*

§. VII.

Confero me nunc ad diagnosticam pertractationem secundæ speciei Atrophicæ, cujus causa ab obstructione tunicae villosæ intestinorum est derivanda. Hæc Atrophica cum antecedenti & subsequenti signa nonnulla habet communia, quædam autem propria. Sic tumor abdominis, reliqui corporis marcor ac contabescencia, sitis magna, uti in illis sic etiam in hac adsunt, in eo vero latet distinctio, quod in hac nulli adsint in abdomine nodi atque tophi, nullæque morificationes, multo minus motus convulsivi, dein alvus hæc quam maxime est fluxilis cum rejectione ciborum semidigestorum, in aliis Atrophicæ speciebus e contra ut plurimum sicca. Febris non semper adest, & quando occurrit, longe lenior deprehenditur.

§. VIII.

Accedo tandem ad tertiam Atrophicæ speciem, quæ originem suam habet ab obstructis glandulis mesenterii, quæque est frequentissima, ejusque diagnosin brevibus tradam. Uti in infantibus facilius est vermium præsentiam cognoscere, quam in adultis, sic etiam glandularum mesaraicarum obstructio longe facilius in puerili ætate constitutis, quam in adultis cognoscitur, sæpius enim in his obstructioni mesenterii causa morbi adscribitur, licet post



mortem hepar vel lien scirrhum sit inventum, & contrario sæpius infarctui vel scirrho hepatis aut lienis morbus adscribitur, ubi post mortem glandulæ mesenterii obstructæ inveniuntur. Sic affert *Tulpius Lib. II. C. XXXII.* exemplum, ubi glandula mesenterii tantam habuit magnitudinem, ut post mortem cadavere secto steatoma in mesenterio fuerit inventum, quod bilanci impositum XVIII. libras ponderavit, licet omnes sibi certe imaginati sint, ægrotantem Hydrope laborare. Plura talia exempla legi possunt apud *observatores*. In infantibus, puëllis ac pueris languor totius corporis ac flacciditas adest, quæ in dies invalescit, torpor animi, fastidium omnium rerum & summa sensibilitas, somnus est levis & inconstans, appetitus plerumque est maximus, in desperato malo vero prostratus, frigida amant, calida fugiunt, post assumptum cibum insignem angustiam atque molestiam percipiunt, color faciei est depravatus, cum aliquali ejusdem inflatione & labiorum pallore, oculi non amplius uti antea fulgent, post somnum interdum palpebræ tument, & reliquæ partes corporis externæ emarcescunt, alvus modo est lubrica modo sicca, ut plurimum vero sicca, urina crassa est, aliquoties plane chylosam illam observari, abdomen est turgidum, tensum atque durum, & si tangimus, multos nodos percipimus, interdum in progressu morbi flaccescit, ante mortem vero quod totum abdomen sit collapsum nuper in puero vidi, adest quoque sitis cum siccitate multa oris, in primis si jam febris est præsens, quæ autem si adest, per noctem maxime affligit, Hæc symptomata si nimium sumunt incrementum, nec convenienti medicina illo-



illorum atrociam impeditur, succedit vera febris lenta aliquando hectica cum insigni virium prostratione.

§. IX.

Tradita nunc diagnosi, me ad pathologicam explanationem converto. Prioris speciei Atrophiae causa, ut in antecedentibus dixi sunt vermes, in Ventriculo atque intestinorum canale stabulantes, quorum secundum plurimorum atque celebriorum medicorum assertum tres tantum dantur species, licet alii quatuor, alii quinque, alii vero adhuc plures allegent atque recenseant. Quidam sunt teretes longi, quibus ob similitudinem, quam cum lumbricis terrestribus habent, nomen lumbricorum imponitur. Alii sunt lati & vel solitarii sese volutant, ad quorum classem cucurbitini, semine cucurbitae similes, referuntur, vel catenatim subinde cohaerent, & e latitudine sua in longitudinem multarum ulnarum diducuntur. Alii sunt teretes breves, qui ascarides vocantur, & vermiculis casei similes sunt, qui saltum facere solent, sed talis motus in hisce ascaridibus non ita deprehenditur, licet denominationem inde nempe ab ἀσκήω moveo accepisse videantur. *Vid. Cl. Funckerus in Conspectu Medic. Theoretico-Practicae Tab. CVIII. p. 843.* Hi ultimi in intestino recto ut plurimum stabulantur, ubi sensibilem molestiam, titillationem, pruritum & tenesmum inferunt. De causis vermium multum adhuc inter medicos disputatur, quorum sententias si quis legere cupit evolvat *Harvei Exercitationes & Christ. Frid. Garmanni tract. Quod omnia ex ovo*, *B. Wedelium in Pathologia Dogmatica Sect. II. Cap. V.* *Varronem L. I. de re rustica Cap. XII.* *Josephi de Aromatar. epistola elegantissima Libr. de rabie contagiosa praefixa*, *Schenckium in diss. de vermibus intesti-*



*testinorum.* Ego verissimum esse arbitror, illorum causam efficientem esse seminium quoddam, ab extra in corpus per cibum & potum vel alio modo delatum, quod vero enutri-ri potest, quando cibi in primis viis non recte concoquuntur, sed putrescunt, observari enim licet vermes in illorum corporibus produci, in quibus actus digestionis est depravatus, qui multos cibos mucidos, dyspeptos, saccharata, mellita, aliaque dulcia magna in quantitate comedunt, quæ assumpta si non recte digeruntur, plus justo diutius in primis viis hærent atque putrescunt, ubi successive copia quædam vermium generatur. Heic objicere mihi quidam posset, ac si dulcia non bonum pabulum essent pro vermibus, sed illos necaret, & quidem innixus asserto *Scipionis Mercurii L. de Obstetric. C. LV. p. 819.* qui statuit, dulcia nauseam parere vermibus, & potius proventum eorum impedire quam radicem protendere, ast vero merito hancce sententiam falsam esse arbitror, quia non solum fere omnes medici contrarium asserunt, verum & omnibus mulierculis est notum, quod illi infantes, qui dulcibus nutriuntur, non solum multos vermes in intestinis plerumque foveant, verum & in capite sane non paucos pediculos. Si vero aliquando inde necarentur, quod tamen erit rarissimum, fit per accidens ob superfluum nutrimentum, id quod confirmat *D. D. Præses in sua Therapia medica Cap. XIII. de Anthelminthicis p. 141.* Multo citius vero vermes generantur, si cibi, qui assumuntur, jam putredinem quandam contraxere, observavi enim aliquoties, quod, si nutrices aut vetulæ dentium carie laborent, vel os non quotidie aqua pura colluant, ut certa quantitas cibi intra dentes hærens maneat atque putrescat, vel alia oris labe uti fistula, ulcere sint affe-



affectedæ & cibos infantum mastigent, quam facillime in infantum corporibus producantur vermes. Lac quoque symbolum suum confert, inprimis si ob debilitatem Ventriculi infantum lac justo diutius in illo stagnat, quod fit, quando infantes a natura nimis sunt debiles, aut lac nimis est crassum atque viscosum, aut mammæ fere semper offeruntur, & sic plus justo ingeritur, quam ventriculus imbecillis ferre potest. Vermes vero ex lacte produci, quotidiana loquitur experientia, quando enim lac recens ponimus in locum calidum, post aliquot dies vermes in illo generantur, item in caseis, qui nihil aliud sunt quam pars lactis coagulata, sæpissime vermes reperiuntur. Obstructio alvi etiam multum contribuit; alvo enim obstructa fæces ob diuturnam moram putrescunt, & ex hac putredine procreantur vermes, & hocce modo ascarides inprimis suum capere ortum opinor. Hi vermes si in ventriculo ac intestinis hærent, absument maximam chyli portionem, ita ut pauca quantitas saltem perveniat ad massam sanguineam, quæ efficit, ut infantes adhuc subsistere possint; si enim nullus chylus adportaretur ad sanguinem, infantes post breve tempus diem obire supremum cogerentur.

§. X.

Jam alterius Atrophiciæ speciei causas investigabo. Oscula vasorum lacteorum sæpius in infantibus obstrui & amurca quadam viscida glutinosa & solidescens naturæ aliquando facta obliniri multi medici & anatomici, qui infantes, tali modo obsessos, post mortem dissequare, observarunt. Radices enim vasorum lacteorum admodum sunt tenues, imo adhuc tenuiores, quam in canibus, quia in his sunt pauciores quam in hominibus, (vid. Clar. *Heisteri Com-*



*pendium anatomicum, edit. alter. p. 64. & delineationem ipsius Tab. II. Fig. 8. )* quæ facillime materia quadam obstrui, vel adstringente quodam constringi possunt. Deinde etiam ex aliis observationibus sana ratione satis superque concludere licet, atrophiam præsentem non ab obstructis glandulis dependere, sed ex alia causa originem ipsius esse derivandam, quando scilicet observamus, infantes quosdam atrophia in summo gradu laborantes, brevi temporis spatio leviter detergentibus & abstergentibus lenissimisque laxantibus ab hocce malo liberari; ita nuper militis cujusdam uxor pro sua puella, quæ VII circiter erat annorum, auxilium a *Cl. Dn. D. Funckero* petebat, quam ego cum sore, quæ variolis tunc temporis laborabat, visitabam, hujus abdomen valde erat distensum ac tumidum cum œdema pedum atque superiorum partium marcore, cui *D. D. Funckerus* præscribebat pulverem incidentem atque abstergentem, ex tartaro vitriolato Tachenii & conchis cum succo citri recentis imbutis, nec non pilulas suas confortantes superius jam memoratas, post quorum remediorum usum insignis quantitas humoris mucosi, tenacis atque visceridi per alvum excernebatur, & paucis diebus præterlapsis, iterum, quod valde mirabar, cum valetudine redibat in gratiam. In hocce casu causa Atrophiae haud erant vermes, nam nulli excernebantur, & ægra tamen reconvalefcebat: infarctum vel scirrhum glandularum mesaraicarum non fuisse, nullus sane prudens medicus in dubium vocabit, quippe illis, qui praxin medicam exercent, est notissimum, quam difficile sit, longumque requirat temporis intervallum infarctum cujusdam partis corporis humani optimis atque congruis pharmacis resolvere, sic  
ut



ut interdum ad glandularum mesaraicarum infarctum discutiendum trimestre, quadrimestre anni, imo adhuc longius requiratur spatium, dein scirrhus, si vere talis est, ut plurimum nullam admittit sanationem, sed inter morbos incurabiles habet locum, quapropter merito concludo, causam fuisse obviscatio ostiolorum ductuum lacteorum, quia mucus viscidus excernebatur, & quoniam ægra tam brevi tempore a morbo liberabatur. Causæ vero quæ hanc obstructionem causantur sunt variæ, primo omnia mucida, viscida, lac coagulatum & crassum, panis calidus, placenta non bene fermentata, pulmenta crassiora ex farina triticea, pinguedines, ut vervecinæ, facile in coagulum abeuntes, & ejusmodi generis plura, quæ omnia facultate pollent obviscandi atque obstruendi parva illa ostiola ductuum lacteorum, inprimis si illis, qui jam potui sunt adsveti, non potus dilutus atque sufficiens porrigatur, ut cibi assumpti satis dilui possint, quo bonæ notæ chylus ex ipsis præparetur, qui commode vasa lactea intrare atque penetrare queat. Dein hocce malum quoque causatur imprudens adstringentium, inprimis martialium usus, quæ facultate pollent hæcce ostiola constringendi, ut accessus chyli successive præcludatur, sed etiam ipsas glandulas mesaraicas indurandi atque obstruendi, ut taceam reliqua mala, quæ ex abusu horum remedium in reliquis corporis visceribus sua trahunt incunabula. Salium mediorum nimium usum quoque ad malum hocce procurandum suum conferre symbolum medici quidam observarunt, & quidem eam potissimum ob rationem, quoniam fibræ tenellulorum sunt tenues atque imbecilles, salia neutra vero uti tartarus vitriolatus, arcanum duplicatum, sal anglicanum,



num, nitrum antimoniatum, sal Sedlicense, sal mirabile Glauberi, & quæ hujus generis sunt plura, stimulant atque nonnunquam constringunt fibrillas, & hoc modo post longum atque in magna dosi adhibitum usum horum salium ostiola vasorum lacteorum constringuntur. A nimia adhibitione terreorum absorbentium, uti sunt conchæ præparatæ, corallia, lap. f. oculi cancr. &c., quoque obstrui posse foramina vasorum lacteorum firmissime opinor, observant enim observatores, qui corpora illorum cultro anatomico dissecuere, quibus absorbentia in nimia dosi tam a medicis quam ab aliis sunt propinata, quod crustæ quædam, solidescentis materiæ tum in Ventriculo tum etiam in annexis intestinis tenuibus oculis sese subjecerint, quæ vix ab horum substantia divelli potuerunt, sicque non solum in ventriculo separationem liquoris gastrici prohibuerunt, verum & ostiola vasorum lacteorum claudere, ut sic chylo aditus ad sanguinis massam fuerit præclusus. Accedit & illud, quod quædam terrea absorbentia imbuta sint vi quadam leniter constringendi, si itaque perveniunt ad intestina in nimia quantitate ostiola ductuum lacteorum etiam possunt constringere, hoc modo successive illa obstruere. Posset heic quidam mihi objicere: absorbentia absumunt acidum & hoc modo generatur sal medium, quod pollet virtute incidente & in pauca dosi infantibus non nocet, atqui in ventriculo est acidum, ergo illud absumunt; major & minor haud possunt negari, ergo conclusio etiam sequeretur; ast enim vero merito heic limbo propositionem minorem, & dico, si acidum semper adest in sufficiente quantitate, qualis requiritur ad illam proportionem terreorum, quæ datur, tunc semper generatur ex con-

jun-



junctione horum corporum sal medium, sed hoc non reperitur, quando absorbentium nimia quantitas assumitur, ergo etiam non saturantur acido & sal inde fit neutrum sive digestivum. Dein, etiamsi generetur sal medium, hoc noxam inferret, quoniam nimia copia adesset ex nimio usu absorbentium orta, hæc enim si recte ac parce adhibentur, numquam nocent. *Sylvius in praxi Lib. I. Cap. 16.* annotavit, atrophiam ortam fuisse a Dysenteria diuturna & exulcerata, forte ob cicatrices in ostiis vasorum lacteorum factas, & *Magnif. Hoffmannus in dissert. de Atrophia* allegat casum de matrona quadam nobili in Belgio, cui loco mercurii dulc. ab imprudenti famulo pharmacopœo mercurius sublimatus corrosivus quum fuerat exhibitus, post maxima ventris tormina tandem exulcerationem osculorum vasorum lacteorum incurrit, & deinceps totius corporis atrophiam atque maciem extremam, atque ea aliquot menses post misere periit.

§. XI.

Tertiæ Atrophiae speciei causam investigaturus primum moneo, mesenterium in se & sua natura ad morbos subeundos esse idoneum, quia multis vasis sanguiferis, varias anastomoses arcus & insulas constituentibus & multis glandulis constat, quæ inter membranas locatæ, multaque pinguedine sunt circumdatæ, quæ fibras vasorum glandularumque reddit laxas, ut non tam vegetus sit tonus in hisce partibus & per consequens humores, qui per ea fluunt, non expedite propellere possint, & sic obstructionibus ansa suppeditatur, quæ eo citius oriuntur, quo magis motus corporis negligitur, & per varia in diæta vitia tonus partium debilitatur. Vid. hæc de re plura in *Magnif. Hoffmanni diss.*



*de febris mesentericis*, in Martino Martini *Libr. de morbis abstrusis mesenterii*, Sylvio *Prax. de intestinorum doloribus*, Fernelio *Libr. II. C. VIII.* Horstio *Libr. II. observ. 8. 4.* Mercato *Tom. III. Lib. I. C. XVII.* Causarum, quibus glandulæ mesaraicæ obstructionem quandam pati possunt magna est farrago. Primum locum meretur nominata debilitas mesenterii, quæ major evadit, quando hæreditaria concurrit dispositio, observavi enim, quod imbecilles ac debiles parentes tales quoque habuerint liberos, & in qua parte pater vel mater debilitatem aut etiam actuale læsionem habuerit, in eam quoque liberi ut plurimum incurrerint, ita ut experientia doceat, atrophiam quoque, uti Rhachitis sive morbus sic dictus Anglicus, familiis quibusdam esse proprium, cujus causam etiam pono in debilitate partium solidarum.

### §. XII

Infantes nuperrime nati sæpius afficiuntur Atrophia, ita ut corpora eorum omni fere carne privata adeo flaccida sæpe cernantur, ut ossa vix musculis tegantur, & vulgus in eo versetur errore, tales infantes primis diebus post partum ab incolis subterraneis permutatione facta ad se, uti dicunt delatos, suos e contra, ante sacri baptismatis adspersionem clam sublato esse, unde tales quoque Wechsel-Bälge vocant. Hujus causam obstructionem pororum cutaneorum esse putat *Cl. Dn. D. Chuden in scripto, cui titulus: Methodus nova præservandi & curandi Atrophiam seu Maciem Infantum* dum scilicet transpiratio non posset fieri in utero materno multæ impuritates in sanguinis massa colligerentur, quæ nutrimentum bonum acrimonia sua conspurcarent, hocque modo impediretur, quo minus corpus



pus tenelluli incrementum capere possit. Licet non negare audeam, quod a transpiratione prohibita multi morbi infantiles sua trahant incunabula, multique visceri atque acres colligantur humores, qui etiam interdum obstructionem mesenterii causari possunt, in primis quando vitium in diæta commissum accedit; attamen non possum cum hocce *Viro doctissimo* obstructionem pororum cutaneorum pro causa immediata sive proxima Atrophiae, uti ille venditat, habere, sed saltem pro causa remota, quæ occasionem suppeditat, ut obstructio in mesenterio fieri possit, & si hæc adest tum primo oritur Atrophia. Si enim verum esset assertum *Dn. D. Chuden* sequeretur, ut omnes infantes, quotquot hanc aspicerent lucem, deberent, nisi sæpius essent loti, accipere Atrophiam, quod vero contra omnem quotidianam experientiam, scribit enim *Vir clarissimus in scripto cit. §. XII.* quod omnes infantes, quotquot nascerentur, habeant obstructos cutis poros tali materia, quæ vocatur crinones obfessos.

### §. XIII.

Haud possum supersedere hac occasione illius opinionis facere mentionem, quam non solum vulgus, sed etiam multi celebres medici foveant de viscosis illiscrementis, quæ in §. *præced.* nominavi, dum putant, illa esse vermes vitam possidentes, qui causa essent Atrophiae, quia bonum nutrimentum, quod tenelluli ex lacte ac cibis accipiant, sufferrent. Inter fautores hujus sententiæ maxime eminet *Celeb. Ettmüllerus*, qui per microscopium eos vidisse gloriatur, eorumque figuram in *Operibus suis* tradidit, ubi illos nominat vermiculos seu animalcula viva, coloris subcinericii, cornibus seu potius antennis binis lon-



longe prominentibus instructos, oculis rotundis, crassiusculis cum cauda oblonga, in fine villosa, uno nomine aspectu horrida. Heic primo quæritur, an ipse non hæcce recrementa jam pro vermibus habuerit, priusquam per microscopium illa contemplatus fuerit, ut dein sibi talem figuram repræsentaverit, quippe mihi plures sunt noti, qui per microscopium omnes tales figuras videre possunt, quas sibi antea sunt imaginati, postea licet verum esset, quod *Ettmullerus* talia animalcula viva in quodam subjecto viderit, haud tamen sequitur, recrementa illa tam in infantibus quam pueris repertibilia in omnibus esse vivos vermes, multi enim medici vermes vivos non potuerunt videre, licet in multis subjectis illa recrementa tam nudis oculis quam per microscopium contemplati sint, imo ego ipse vitam ac motum illos habere haud vidi. Quare potius cum aliis medicis statuo, in infantibus neonatis nec non ætate provectioribus, in quorum poris tale quid reperitur, quod vocant crinones, ut plurimum esse excrementum quoddam viscosum, quod gestationis tempore collectum, & in balneo post partum haud recte est absterfum, quodque dein, quando infantes crescunt, & per transpirationem non noxia expelluntur recrementa suum capit augmentum. Interim penitus inficias ire nolo, nullos plane dari casus, ubi non vera adessent animalcula, cum medici quidam ea observaverint, verum enim vero credo in paucissimis subjectis saltim illa esse præsentia, & quidem in illis, in quibus humores nimis sunt depravati, in spurcitate externa vivunt, & materia illa viscida & excrementitia in poris cutaneis hærens in putredinem abit, ut sic ex ea generentur vermes.



§. XIV.

Alia causa Atrophiae hujus est nimia voracitas, cui teneri sunt dediti, quæque a parentibus per hæreditatem ipsis sæpe est donata, hæcque inprimis nocet, quando cibi admodum sunt mucidi ac viscidi, ut sunt panis recens vel haud bene coctus, pulmenta farinacea, caseus durus, carnes bubulæ annosæ, valde & dense fibrosæ, exsuccæ & macræ, pisces marini, carnes fumo induratae &c. quæ non bene in ventriculo tenellulorum concoqui possunt, ut bonus eliciatur chylus, quique separatur est crassus & minus idoneus perveniendi per glandulas mesenterii ad M. S. sed successivè in iis portio stagnat, & cum tempore in totum obstruuntur. Hoc eo citius fit, quando potus non est purus ac dilutus, sed multis particulis terreis minus solubilibus refertus, uti sunt quædam aquæ & si cerevisiæ novellæ, crassæ, feculentæ & corruptæ, vina acida, rancida & immatura assumuntur. Motum si pueri vel puellæ non habent, sed semper in uno loco sedere debent, quoque suum confert symbolum, quippe tunc digestio non rite peragitur & humores crassi haud fiunt fluxiles. Cibi acidi adhuc plus nocent quam mucidi, a quibus in *Lusitania* uti *Cl. Londinensium Medicus, Fridericus Slave* in *A. E. L. anno 1716. Martii p. 142.* refert, frequentissime oritur atrophia. Dantur quoque observationes, ubi infantes vel pueri atrophia sunt affecti, quando aliquoties noctu, dum fuere calefacti & sudore perfusi, frigidus potus ipsis est datus, qui chylum, si adhuc quidam in ventriculo vel intestinis hæret, coagulat, & præterea etiam vasa lactea & glandulas mesenterii constringit. Sic existat in *A. E. L. an. 1701. Novembr. p. 522.* quod multi pue-



si cum prætumido abdomine & contabescencia corporis ad curandum sint oblatis, ubi nulla alia causa inveniri potuit, quam quod noctu potum frigidum assumere fuerint adfueti. Febres intermittentes uti sunt quotidiana, tertiana, quartana, si invadunt infantes, & a medicis imprudentibus cum cortice chinæ, croco martis adstringente, alumine vel aliis adstringentibus supprimuntur, priusquam causa morbifica est remota, tunc pressio pede sequitur atrophiam, quia non modo causa morbifica febris in corpore relinquitur, quæ variis noxis ansam præbet, verum etiam ostiola vasorum lacteorum, ipsa chyliifera vasa, nec non glandulæ, per quas hæc transeunt, nimium constriunguntur atque obstruuntur, hocque modo chylo aditus per ductum thoracicum ad M. S. præcluditur atque impeditur. Hoc etiam fieri sæpius in praxi constitutis licet observare ab adstringentibus, in diarrhoeis tam a vulgo quam medicis statim in principio adhibitis. Opiata non recte usurpata multum quoque conferunt ad procreandam atrophiam, quippe tonum omnium partium nimis relaxant, & per consequens vasorum lacteorum & glandularum mesaraicarum, quarum tonus si est dejectus chylus adfluens non rite propellitur, sed in illis stagnat. Achores, tinea capitis, crusta lactea, quando per frigus vel mala medicamenta retropelluntur, & materia illa acris fertur ad mesenterium, glandulas ibi sitas constringit, ita referunt *Act. Medic. Berol. Vol. IV. an. 1718. p. 54.* exemplum, ubi puella V. annorum ex achoribus & scabie retropulsis, Atrophia cum febre abdominisque duritie est afflicta.

§. XV.

Magnus numerus infantum in nostris regionibus  
quo-



quoque morbo hoc admodum pernicioso infestatur ab usu potuum nimis spirituosorum, inprimis spiritus vini vel frumenti, qui a multis parentibus, & heic Halæ præsertim a salis coëctoribus qui vocantur *Hallorum* tenellulis incunis interdum adhuc jacentibus ad roborandum corpus datur, quantum verò exinde oriatur damnum, firmisimis argumentis hisce hominibus haud est persuadendum. Interim credunt, si infantes omni carne privantur, morbum esse ex fascino, tamque absurda loquuntur, ut illi, qui melius hocce intelligunt, aures obstruere interdum necesse habeant. Hac de re inter alios scribit *Celeb. Coschwitzius*, *Fautor ac Præceptor meus honoratissimus in sua Pathologia: Pectus spirituosum, qualis est Spiritus Vini, abusive usurpati, chylum non modo turbant, & ad spissitudinem disponunt, sed glandulas ventriculi & intestini duodeni constringendo, Menstrui salivalis accessoriam eructationem, pro meliori chylificatione requisitam, impediunt atque supprimunt. Cujus rei sæpissime in praxi quotidiana plurima occurrunt testimonia de infantibus atrophicis, qui tales, nimis credulæ superstitionis argumento, per incantationem aut fascinum creduntur ac supponuntur; cura tamen, facta debita causarum exploratione, dilucide pateat, ipsos parentes incantatores fuisse, & sub perversa ac intempestiva actum concoctionis promovendi cura, infantes tenellos ad hoc malum disposuisse.* Concentrata spirituosum vero, uti est spiritus vini, vario modo in corpus humanum agunt, primo enim coagulant chylum ac reliquos humores, quando enim adjicimus spirit. vini vel frumenti rectificatum lacti, caseosa materia decedit ad fundum, cum itaque chylus fere nil aliud sit, quam lac, hunc quoque coagulare potest. Idem

D 2      fit



fit cum sanguine, ex vena recenter emissio, si ipsi admiscetur spirit. vini statim serosa pars secedit a parte crassa, quod alias primum fit post semihoræ spatium, si sanguis libero aeri exponitur, quare in corpore nostro simili modo potest coagulare sanguinem, ut inde varii infarctus ac scirrhi sua trahant incunabula. Cur autem spirit. vin. humores corporis nostri coagulet varii medici ac chymici variam allegant causam, mihi vero est probabilissima dependere illud ab acido, quod est in spirit. vini, innixus experimento, quod allegat *Ill. Stablius in Zymotechnia sua p.122* ubi per injectionem salis cujusdam alcali in spirit. vini ex inde produxit verum sal medium sive digestivum. Salia media vero ex nullis aliis principiis esse conflata, quam ex sale alcali & acido quodam, illis est notum, qui principia chymiae primis saltim labris gustarunt. Deinde etiam spirit. vini constringit partes solidas & hoc modo salivæ se & excretionem cohibet, qui humor ad digerenda alimenta admodum utilis & necessarius est, constringit etiam glandulas in ventriculo sitas, liquorem gastricum secernentes, simile officium cum saliva habentem, constringit quoque vasa lactea & glandulas mesenterii, & sic chyli aditum ad M.S. prohibet. Spiritum vini vero fibras constringere posse variis experimentis illustrari potest. Quando enim asservare cupius partem quandam mollem corporis humani, imponimus illam spiritui vini, & sic per XXX. & plures annos a putredine præservari potest, nullam aliam ob rationem, quam quod pori carnis constringantur & hoc modo aeris ingressus quodammodo præcaveatur. In vulneribus ac hæmorrhagiis externis quoque se stypticum probat, quando scilicet calidus



lidus applicatur, sanguinis fluxus statim sistitur, quia tubuli sanguiferi constringuntur, & sanguis, qui in ipsis reperitur, coagulatur. Hæcce phænomena itidem dependent ab acido, quod continet spiritus vini. Similem effectum constrictorium in glandulas mesenterii præstitisse & hocce modo Atrophiam produxisse aquas cum vino destillatas observavit *Ioan. Jacob. Wepfferus in observ. medico-practicis, de affectibus capitis in & externis observ.* CXVIII.

§. XVI.

Prognosin in morbis dare est difficillimum, quoniam variæ causæ externæ possunt bonum exitum, quem medicus prædixit, alterare atque prohibere, quando vero malum exitum nuntiavit, per naturæ vires vel aliis ex rationibus causa morifica interdum vincitur. Interea aliquando medicus firmam potest dare prognosin, si recte morbi genium atque causas perscrutatus est, talibusque, si spes salutis adest, instructus est remediis, quæ causam morbi removeere valent, eaque debito modo adhibere ipsum non latet, & ægrotis serio inculcat illas res, a quibus tamquam noxiis abstinere debent, hique medico faciles præbent aures & obsecundant, & Deus O. M. sua benedictione adest.

§. XVII.

Lumbrici si in intestinis tenuibus hærent facilius æque possunt necari, ac si sedem suam habent in crassis, & licet remedia anthelminthica, quando ad crassa perveniunt, intestina cum fæcibus alvinis sint mixta, & maximam efficaciam amiserint, tamen per clysterem infra commendatum quoque possunt vita privari. Heic dicere aliquis



posset, lumbrici in intestinis crassis hærentes non possunt absumere chylum & hoc modo producere atrophiam, quia nullus adest, sed respondeo, chylum utique in intestino colo adesse, & separari, ac in vasa lactea ibidem sita vehi, quia hæc nudis oculis in canibus possunt videri, & quod inprimis assertum meum probat, sunt observationes illæ, ubi in hæctica aliisque morbis, in quibus ægroti neque ingerere neque digerere potuerunt, clysteres nutrites ex lacte ac saccharo sunt adhibiti, post quorum usum ægri sunt recreati & quodammodo nutriti, si itaque nulla vasa lactea in intestinis crassis essent, clysteres nutrimentum corpori præbere haud potuissent, quia ad intestina tenuia ob magnam valvulam Bauhini pervenire haud possunt. Vid. *Magnif. Hoffmannus in Medicinæ rational. systemat. Tom. I. part. II. Cap. VI. §. XIII. & XIV. p. m. 195.* Accedit & illud, quod raro quædam lumbricorum copia in intestinis crassis hæreat, ubi simul in tenuibus non quidam essent præsentis, quare hi devorando chylum id adimplent, quod illi præstare haud valent, ut ex multa consumptione chylosi succi tandem oriatur atrophia. Ascari- des difficiliter quoque lumbricis in intestinis tenuibus stabulantibus per remedia oretenus oblata excernuntur. Vermes qui vocantur lati, quia communiter universum intestinorum systema occupant, ac in admodum magna copia adsunt, expulsionem pertinacissime solent resistere. Insuper adhuc indicandum est, vermes in intestinorum canale hærentes, cujuscunque generis sint, non una vice posse necari, sed successive, ita ut aliquot dies imo interdum hebdomades ad illos expurgandos requirantur. Quando vero in totum sunt expulsi & præterea nulla obstructio vasorum lacteorum vel

gland.



glandularum mesaraicarum est præsens, æger postea, nisi atrophiam nimis sit inveterata, facile post adhibita alimenta nutritia cum pristina valetudine potest redire in gratiam.

§. XVIII.

Secundæ Atrophie speciei, quæ ab obstructione vasorum lacteorum dependet, prognosin quod attinet, illa est curatu facillima, quando scilicet causa ipsius est tenax ac viscidus quidam mucus, qui ostiola vasorum lacteorum obstruit. Hic facili negotio per remedia incidentia, resolventia, & diluentia successive resolvi & postea lenibus laxantibus ex intestinorum canale educi potest. Quando vero oritur ab imprudenti adstringentium, vel etiam nimio usu salium, vi constringente prædictorum, multo longius ut plurimum requiritur tempus ad curandam Atrophiam, quippe fibris constrictis non tam facili negotio per humectantia ac relaxantia remedia elater ac tonus, quem antea habuere, potest restitui, sed continuatus illorum medicaminum requiritur usus. Origo nostri morbi si adscribenda est abusu remediorum absorbentium, & malum jam diu duravit, ut materia soliditatem quasi acquisiverit, in arte nostra non est positum, ut statim causam hancce removeamus, sed si spes salutis adhuc adest, diu cum medicaminibus est continuandum, multi vero vitalia relinquunt lumina. De ea Atrophia, quæ oritur post dysenteriam ab erosione ostiolis vasorum lacteorum prognosin format *Celeb. quondam Lipsiensium Medicus, Langius, in suis Oper. Part. II. Disp. XXI. p. 279. dum dicit: Quod si atrophiam a consolidatis vasorum lacteorum orificiis perque citatricem clausis oritur, curam certe nullam*  
ad-



*admittit, sed tanquam lethalis Deo atque Fato est commenda-*  
*danda.*

§. XIX.

Atrophia, quæ oritur a glandularum mesaraicarum obstructione curatu est difficillima, quippe humor stagnans partemque obstruens non facili negotio potest resolvi ac discuti, sed admodum longum ut plurimum requiritur tempus, & quando diu remedia sunt continuanda, infantes vel etiam pueri medicamenta tamquam res ipsis admodum ingratas respuunt, sicque medicus finem suum assequi haud valet. Malum quando est inveteratum, non solum mesenterium, sed sæpius etiam aliæ partes internæ uti Hepar, Lien, Pancreas, Renes atque Pulmones sunt infarctæ ac scirrhosæ, uti sectiones atrophico-  
rum ostendunt. Vid. *A. N. C. an. 4. obs. 77. & Act. Medic. Berol. Decad. I. Vol. VII. p. 77. & 78. nec non Decad. II. Vol. II. p. 83.* & tunc raro aut nunquam curatur. Febris lenta quando jam præsens est, impossibile fere est ea adhibere remedia, quæ infarctum resolvere possunt, quippe hæc febrim exasperant & hoc modo multa mala inducuntur. Bonum signum est, & curationem & salutem promittere licet, si coctio perfecta & bona sese sistat, si appetitus redeat, tumor abdominis decrescat, vires recollegantur & si non nimis diu duraverit. Obstructio mesenterii quando oritur a perverso adstringentium & spiritus vini usu, nec non a scabie retropulsa, curatio est difficilior, quam si ab alimentis mucidis ac tenacibus est orta, ea ex ratione quam in §. *præced.* adduxi, & quia recrementa scabiosa non facile iterum possunt expelli. Atrophia quando originem habet a febribus intermittentibus  
sup-



suppressis, & hi per convenientia remedia possunt revo-  
 cari, spes salutis adest, quando vero non in artis est po-  
 testate valde difficilis est curationis. Dolor quando ad  
 huc adest in scirrho bene sperandum esse *Practici* affir-  
 mant, quia testaretur materiam infarctam adhuc paulo mo-  
 bilem esse, & facilius resolutioni obsecundaturam. Si  
 nimia diarrhoea adest, & materia purulenta admodum  
 foetida cum sanguine mixta per alvum excernitur, cor-  
 pus insuper valde est emaciatum, medicus prudenter se-  
 se gerit, quando curam in se non suscipit, fere omnes e-  
 nim e vita discedunt, eam potissimum ob rationem, quia  
 diarrhoea consumit reliquas vires, quæ adhuc adsunt, &  
 foetida illa materia cum sanguine mixta indicat corrupti-  
 onem in abdomine jam esse præsentem, quæ per nulla  
 pharmaca curari potest. Quando infarctus vel scirrhus  
 in exulcerationem abit, quod ut plurimum fit, quando im-  
 prudenter humectantia ac relaxantia externe adhibentur,  
 supervenit febris hæctica, quam indicat urina flammea &  
 rubicunda, interdum cum sedimento rubro, nec non æ-  
 stus ac phlogoses post cibum, ut plurimum tunc infantes  
 secundum plurimum medicorum assertum succumbunt,  
 & ego non recordor, unquam quendam in infantili ac  
 puerili ætate constitutum evasisse, ubi vera febris hæctica  
 adfuit, licet mihi adhuc in recenti sit memoria, feminam  
 quendam XL. circiter annorum, quæ ante semestre meo  
 utebatur consilio, misere laborasse vera febre hæctica, o-  
 mnia enim aderant symptomata, febris hæcticæ propria, &  
 quidem, ut ego juste conjecturare poteram, ex læsione  
 quadam Lienis, quæ tamen Deo benedicente post aliquot  
 hebdomades per decocta, quibus ingrediuntur radices ac



herbæ, quæ moderate abstergunt atque discutiunt, est restituta, febris enim filet, vires antea prostratæ sunt restauratæ, appetitus rediit, & patiens sua negotia domestica iterum potest peragere.

§. XX.

Dum ad Therapevticam affectus præsentis pertractationem me accingo, in limine ipsius statim monere utile esse duxi, curationem Atrophici non uno eodemque modo posse fieri, sed secundum causas, ætatem, corporum constitutionem, aliasque circumstantias variare, morbos enim curare nihil aliud est, quam ipsorum causas remove-  
re. Itaque primo tradam, quomodo vermes, qui Atrophiam possunt causari, sint eliminandi. Ad hoc opus perficiendum duæ indicationes requiruntur: I) Vermium enecatio II) ipsorum eliminatio. Sine enecatione enim non potest commode fieri eliminatio, quia dato quodam purgante vermes præsertim majores osculis suis firmiter adhærent intestinis, eaque valde lancinant & arrodunt, nullusque vermis expellitur. Quando itaque lumbrici in intestinis tenuibus vel lati in intestinorum canale hærent, ad hosce necandos commendo *Essentiam ex parte una Essentiæ stomachicæ B. Richter*, quam descripsit in seinem Unterricht von der Gesundheit und deren Erhaltung dem andern Theil im XI. Cap. p. m. 849. & *una parte Essentiæ Tanaceti*, de qua ter per diem sumi potest. Ad eliminandos autem vermes, ne in putredinem abeant & dira mala provocent, in usum est trahendus *pulvis purgans sequens*: Recip. CC. sn. ign. gr. VI. Res. Jalap. ppt. gr. III. Mercurii dulcis rive ppt. gr. II. ol. d. anis. gt. I. M. f. Pulv. Essentia per II. vel III. dies potest adhiberi, dein die IV. mane pul-



pulvis purgans, hocque fieri debet ter vel quater servato præscripto ordine. Hæcce remedia non debent propinari Luna accrescente, sed decresciente, quia multi medici practici observarunt, hoc tempore melius succedere eliminationem vermium quam illo, ubi bonis datis anthelminthicis nullus ut plurimum evacuatur vermis, & licet quidam id negarint, non observationibus sed suis opinionibus innixi, quia non comprehendere possunt, quomodo luna ad hocce opus aliquid contribuere possit; ast quamquam non semper rem quandam a priori demonstrare ratio nostra valeat, tamen eam prorsus negare, si a posteriori veritas ostendi potest, mihi absconum videtur. Quibus placet fortia anthelminthica in usum trahere, illi ab hisce abstineant, quando vermes pariunt nimios dolores, sed potius delinientia atque antispasmodica adhibeant, placatis vero vermibus, illa interdum usu venire possunt, proveniunt alias multæ exinde noxæ, uti observavit *Magnif. Hoffmannus*, cujus vide sis *Medic. rational. systemat. Tom. II. Part. II. Cap. XI. & VI. p. 323.* Uno mense si non omnes vermes eliminari possunt, altero mense illorum usus est repetendus. Dosis horum remediorum quoniam differt ratione ætatis, temperamentorum, corporum constitutionis accurate determinari a me heic non potest, sed quilibet, qui per varios casus medicos iudicium practicum acquisitus est, pro circumstantiarum ratione facile dosin, quando ægrotum talem in curam accipit, rite ordinare valebit. Essentiam hancce ob suam amaritiam vermes egregie necare experientia confirmatum habeo & pulvis laxans quoque absque incommodo eos evacuat, ac Mercur. dulcis, qui eum ingreditur non solum eos eliminat,



sed etiam ipsos, quando adhuc vita fruuntur, necat, de  
cujus singulari virtute vid. *Celeb. Boyle tract. de Specificis*  
& *Magnif. Hoffmannus loc. jam cit.* dicit, mercurium dulc.  
cum purgante datum omnium aliorum anthelminthico-  
rum vires exsuperare, nec non in *Act. Med. Berol. Decad.*  
*Vol. II. an. 1717. p. 61.* exstat casus, ubi cum mercur. dulci  
ex puella, V annorum ingens ascaridum copia per inter-  
valla est evacuata. Loco commendatæ Essentiæ etiam  
præsertim in pauperibus *Semen Santonici* seu *Cinæ*, melli  
ac rob Sambuci involutum usurpari potest, post cujus u-  
sum quantitatem lumbricorum insignem excretam fuisse  
observavi, nec obstat, quod quidam medici de hoc semi-  
ne affirmant, illud nempe ob suam acrimoniam ac amari-  
tiem noxam inferre, ego enim a teneris subjectis absque  
ullo incommodo usurpatum fuisse scio. Interim nimium  
illius usum haud approbo, præsertim absentibus vermibus,  
quippe tunc utique nocere potest, de quo videantur *Zwin-  
geri Observationes*. Quidam illud dare solent in decocto  
ex lacte parato, sed quoniam nimis amarum fit, ut pueri  
assumere illud recusent, modum huncce usurpandi disua-  
deo, quia quando melli ac rob sambuci est immersum,  
præsertim si nesciant, quid in illis lateat, numquam com-  
edere detrectant.

§. XXI.

Debiles quando sunt ægroti & hanc essentiam &  
pulverem non ferre possunt, in horum locum substituere  
licet *pil. ad modum Beccheri præparatas*, quæ non solum  
vermes necant, sed etiam ex intestinorum canale elimi-  
nant. Infantibus lactantibus hæ etiam dari possunt. Si  
post usum anthelminthicorum internum vermes non ex-  
cer-



vernuntur, *clysteres* ex lacte & saccharo paratos ad intestinorum canalis finem illos invitasse & postea excretos fuisse observarunt *Magnif. Hoffmannus in Collegio Practico & Langius l.c.* Quando lumbrici in intestinis crassis hærent, cuius rei iusta suspicio adest, quando remedia interna nullos lumbricos ejecerunt, & tamen certum est, atrophiam ex vermibus adesse, nec non si ascarides in intestino recto suam habent sedem, remedia per os superius data, ut plurimum sunt inertia, ob rationem in §. XV. allegatam, sed *clysteres anthelminthici* egregiam sane præstant opem. Potest huic fini satisfacere sequens: Recip. *Rad. Graminis Herb. Tanacetiana Mj. Summit. Absynthii Mss. Allii Drachm. II.* Coque in lacte ad remanentiam Unciar. VIII. Colatur. adde *Fellis Tauri Scrup. I. Oleum Absynthii cocti Drach. II. Sal. comm. Drach. I. M. f. l. a.* Clyster. hic aliquoties applicari potest. Abstinendum vero est ab hocce, quando vermes saltem adsunt in intestinis tenuibus, quoniam isti tunc sentientes amaritiam clysteris sese conferunt ad ventriculum & ibi varia mala provocant. Hisce remediis quoque jungi potest inunctio abdominis cum *oleo absynth.* & *Zedoar* non solum quando lumbrici in intestinis crassis ac tenuibus, sed etiam quando lati cucurbitini sunt præsentés, quibus effectus internorum remediorum promovetur. Sine internis remediis *bilis bovina* externe adhibita interdum etiam vermes necat. Evacuatis tandem omnibus vermibus ad referanda vasa lactea, quæ non exacte patula esse solent, quia hucusque chylus ea non debite permeavit, nec non ad roborandum ventriculum, intestina reliquasque partes commendo sequentem *Tincturam*: Recip. *Tinct. Vi-*



*triol. Mart. aperitiv. Ludovici Drach. II. Tartari Drach. I.*  
M. d. De hac pro ætatis & subjectorum conditione dari potest. Tandem ad nutriendum corpus adhibeantur illa alimenta, quæ chylum laudabilem producant, uti sunt juscula confortantia die Kräft-Brühen, gelatinæ, ova sorbilia, animalium juniorum carnes succulentæ &c. Infantes adhuc fugentes, posteaquam tonus partibus est restitutus lac tamquam bonum nutrimentum habent, modo crasis ipsius, quando peccat, per congrua remedia nutribus exhibita corrigatur & quod bene notandum, marmæ non tam sæpius dentur, uti perversus est mos, quando præsertim nutrices multum lactis possident & infantes sunt debiles. Ablactatis lac quoque egregium præbet nutrimentum, imprimis caprillum atque asininum, quæ multas particulas oleaginosas continent & lac, quia jam est uti chylus, non tam robustum requirit ventriculum, uti cibi duriores, ast hæc sedulo observetur cautela, ut, quando pueri multum acidum in stomacho foveant, ante usum lactis aliquot guttulæ *olei tartari per deliquium* ordinentur, quo acidum præcipitatur & in sal digestivum convertitur, quod lactis coagulationem impedit, dein etiam una vice non nimis larga quantitas est assumenda, ne Ventriculo plus justo imponatur, quam ferre potest. Præterea adhuc moneo, quod omnes res quæ ad genesin vermium aliquid conferunt sedulo sint vitandæ, ne malum iterum recrudescat.

§. XXII.

Ad secundæ speciei Atrophix curationem me jam confero. Quando causa est mucus quidam viscidus, ostiola vasorum lacteorum obstruens, ad illud incidendum



ac resolvendum sequentem commendo pulverem: *Rec. Salis digestivi Sylvii Scrup. II. Absyntbii Scrup. I. M. f. pulvis.* Qui vero a pulveribus abhorrent nec non infantibus dari potest *Liquor terræ foliatæ tartari* eo modo præparatus, quo eum descripsit *B. Dn. D. Stabel in sua Chymia Dogmatico-Experimental Tom. II. Cap. XXI. p. 279*, qui leni modo quoque egregiam præstat opem. Hisce pulveribus vel liquori interponi etiam debent ea, quæ materiam hancce evacuant, cui usui inservire possunt *pil. ad mentem Beccheri præparatæ*, vel *pulvis purgans* in §. XX descriptus in infantibus vero fugentibus *Syrupus de Cichorio cum Rhabarbaro & Oxymel squilliticum.* Jungenda insuper hisce medicaminibus sunt diluentia, inter quæ principem locum adscribo aquæ simplici, quæ levis est & non multis terreis ac impuris particulis referta, qualis est aqua pluvialis & quæ huic similis per destillationem a partibus crassis liberata. Verum enim vero aqua pluvialis non sub tectis est colligenda, quæ multas possidet impuritates sed sub libero & aperto cælo & postea conservanda in figulinis vel vitreis vasis sedimento prius deposito maxime in locis frigidioribus. Aquæ huic calefactæ pro lubitu etiam injici possunt herbæ, quæ resolvunt ac roborant, uti sunt herba Thee, Veronicæ, Hederæ terrestris &c. Quando malum ortum est a nimio salium mediorum & imprudenti adstringentium usu, tunc ea sunt in usum trahenda, quæ demulcent ac fibras constrictas relaxant, quæ inter commendo *oleum amygdalarum dulcium* in debita dosi ac ordine usurpandum. Cavendum vero est, ne justo diutius usurpetur, alias noxam inferre potest. Postea referendi gratia adhibeatur *Liquor terræ fol. tartari.* Si ve-



ro malum oritur a nimio usu terreorum absorbentium, *Infusa diluentia*, quæ in præcedentibus nominavi, ut & laxantia uti *pulvis purgans* commendatus vel *Pil. Beccherianæ* optimam ferunt opem. Exstirpata sic causa morbifica, observentur ea, de quibus in §. præced. dixi. Cautelam quandam in curatione adhibendam adhuc adjicere utile ac necessarium esse duco. Obstructis ostiolis vatorum lacteorum sæpe oriri solet diarrhœa, ubi multæ partes chylosæ excernuntur, quæ per vasa lactea pervenire haud possunt, quam sistere quidam conantur adstringentibus, ast malum semper pejus reddunt, quare ego potius unicuique consulo, ut causam morbi removeat, quia tunc hocce symptoma sine remediis adhibitis cedit.

### §. XXIII.

Antequam ad therapevticam tertiæ Atrophiciæ speciei me accingam, de præservatione ipsius pauca monebo. Observavit sedulo *Cl. Dn. D. Chuden l.c.* illos infantes, qui sæpius post partum lavantur, non tam facile non modo in hunc, verum etiam in alios cutaneos morbos incurrere, quam alii, in quibus hoc est intermissum. Quod quum rationi & experientiæ respondeat, auctor suatorque sum, ut *balnea* iteratis vicibus primo mense post partum adhibeantur. Parari hæcce possunt ex aqua simplici & herbis emollientibus, roborantibus atque nervinis, uti sunt *Herba Albæ, fl. chamomillæ utriusque herb. & sum. millefolii, malvæ, majoranæ, origani, serpilli, melissæ, rosmarini & salviæ*. Modum adhibendi & cautelas circa illum observandas quia satis bene tradunt *Cl. Chuden l.c. & alii* huc apponere nolo. Insuper causæ reliquæ, quæ ad atrophiam gignendam aliquid conferunt, sedulo uti in duabus aliis Atrophiciæ



trophiae speciebus sunt vitandæ, quia morbi melius præservari quam curari possunt.

§. XXIV.

Quando vero Atrophia jam est præsens & originem suam habet a nimia voracitate alia via est ineunda, interna nempe remedia in usum quoque sunt trahenda. Corpus itaque primum ad curationem est præparandum, quod fit, dum ventriculus & intestina ab impuritatibus, quibus sunt referta, liberamus. Hocce nobis ostendit ipsa natura, dum vomitum interdum concitat, & impuritates ex ventriculo duodeno ejicit, quare naturæ minister diligenter, quando certus est, farraginem impurorum humorum in ventriculo hæere, id imitari & ut cruditates removeat, omnem debet navare operam. Ad quem scopum obtinendum commendo *titillationes in faucibus infantum cum digito, vel potum aquæ calidæ, cui injectum est pauculum salis comm. & olei oliv.*, post cujus usum ac repetitionem si non sequatur emesis (sequitur vero plerumque) ad lenia vomitoria est confugiendum, ubi *Tart. emet. Mynsichtii* in aqua scenicul. vel menth. solutus, aut pulvis rad. hypecacannæ, quando prudenter adhibentur, egregie proficiunt. Reliqui pravi humores, qui in intestinis hærent, per *pil. ad modum Beccheri præparatas*, vel per *pulv. purgantem* in §. XX. commendatum, vel etiam per *pulv. sequentem*, ubi variat dosis secundum ætatem aliasque circumstantias, eliminari possunt; compositio ipsius est sequens: Rec. *Resin. Jalapp. gr. III. terantur cum Amygdal. excorticat. Sacchari canariens. ana gr. VIII.* Hic pulvis, quia teneri remedia plerumque recusant, in testam potest injici, cui superaffunditur decoctum fabar. Coffeé, hocce modo la-



xans reinedium occultatur, & pueri sine nausea illud adsumunt. Infantibus fugentibus, ut & illis, qui admodum teneræ sunt constitutionis, loco hujus pulveris *duo syrupi superius laudati*, vel etiam *pil. Becherianæ* in usum trahi possunt. Hocce modo quando semel vel bis evacuatae sunt primæ viæ laxantibus hisce medicamentis sunt interponenda illa, quæ obstructas glandulas mesenterii referant atque aperiunt, cui fini satisfacit *Liquor terræ fol. tartari* rite præparatus, qui in referendis obstructis visceribus egregie se commendat, & licet aliquandiu, quod in Atrophia fieri debet adhibeatur, tamen nullum tale exinde provenit incommodum, quale a nimis longo salium mediorum usu timere debemus. Sic mihi noti sunt duo pueri atrophici, qui a medico magni nominis erant relictæ, quia nulla salutis amplius apparebat spes & mors quotidie expectabatur, quibus *B. Stabel* solum huncce liquorem per aliquot tempus dedit & ambo felicissime penitus sunt restituti, optimaque fruuntur sanitate. In robustioribus subjectis loco hujus liquoris quoque *Mixtura ex Tinct. antimon. acri Stablii vel tartarifat.* atque *Essent. Succini sine alcali præparata* in anatica portione mixtis usu venire potest, a qua quoque egregiam resolventem virtutem observavi. A perverso Spirit. vini & adstringentium usu quando malum oritur, eadem methodo cura instituitur, modo jungantur remedia antispasmodica. Insuper non omittantur *infusa theiformia* in §. XXII. commendata, quæ non satis laudari possunt, quippe non solum diluunt ac resolvunt materiam in glandulis mesenterii stagnantem, verum etiam transpirationem ac diuresin, quæ necessariæ se- & excretiones in hocce morbo ut plurimum sunt impeditæ, optime promovent



movent. *Balnea præscripta* quoque, modo non sint nimis calida, haud sunt contemnenda, quia per aquam calidam pori cutanei aperiuntur, mucus, si quidam in illis hæret, eliminatur, transpiratio læsa iterum restituitur, & impuri humores, qui hucusque in corpore sunt collecti, per halitum insensibilem ejiciuntur. Hisce quoque jungi possunt *unguenta & emplastra emollientia & resolventia*, quæ abdomini externe applicentur, quem in finem commendo *Unguentum ad Rhachitidem infantum Cl. D. Sydenhamii*, cujus descriptio est hæc: Rec. *olei lilior. albor. tamarisci ana Unc. II. Succi Rad. bryoniæ apii ana Unc. I.* bulleant ad succorum consumtionem, addendum postea *Unguentum de althæa Butyri insulsi ana Unc. I. Gummi ammoniaci in acet. solut. Unc. semis Cerae flavæ q. s. M. f. l. a.* Unguentum. Inter Emplastra bonum esse judico *Emplastrum saponatum Barbette camphoratum*, quod non solum emollit sed etiam resolvit, quodque ita componitur: Rec. *Minii, Cerussæ, Saponis venetæ ana Unc. V. ole. olivarum Lib. I. A-xung. porcin. Unc. semis. M. f. l. a.* Empl. *camphora*, quantum placet, imbuendum. Prudenter vero hæc a medico usurpari debent, ne nimia fiat emollitio, ex qua oritur abscessus.

§. XXV.

Posteaquam methodo hac curatoria glandulæ mesenterii sunt apertæ, & succo chyloso iterum libera via ad massam sanguinis est donata, partes debilitatæ iterum sunt roborandæ ac nutriendæ, ubi primum in finem commendo *Tinct. Vitriol. Mart. aperitiv. Ludovici*, quæ resolvit ac ro-



borat, & a plurimis practicis recentioribus in glandularum mesaraicarum obstructione commendatur, cui externe jungi possunt *balsama solida roborantia*, abdomini imposita, quæ præparari possunt ex *ol. N. M. expr. ol. destillat. Carvi, Rorismarini, Rutæ, Salvie, Aneth. Caryoph. Majoranæ, ment. crisp. juniperi veri & Bals. Peruviano*, alteri scopo autem inserviunt nutrientia ac gelatinosa, de quibus in antecedentibus dixi. Febres intermittentes quando præmature sunt suppressæ, istæ, tamquam motus comparate salutare per convenientia pharmaca sunt revocandæ, cui fini satisfaciunt *pulvis ex tart. vitriolat. & conchis succo citri imbutis ana præparatus*, qui ter per diem detur, vesperi autem *Pil. Beccherianæ* porrigantur. Quæ remedia, si per unam vel duas hebdomades in convenienti dosi & ordine sunt adhibita, observavi, febrem revocatam fuisse, quæ, quando iterum adest, methodo congrua est tractanda, ut resolutio infarctus promoveatur, & sanitas ægroti restituatur. A diarrhœa per adstringentia nimis cito suppressa quando atrophia oritur, illa quoque per *pil. Beccherianas* est provocanda, & dein causa, a qua provenit diarrhœa convenientibus remediis est removenda. Quando a perverso opiatorum usu atrophia suam originem duxit, obstructiones sunt referandæ & tonus partibus restituendus, ubi *Tinct. Vitriol. Mart. aperitiv. Ludovici* usum præstare potest. Si recrementa scabiosa a partibus exterioribus ad interiora sunt repulsa, ea proficiunt, quæ leniunt, temperant ac materiam peregrinam iterum ad habitum corporis externum promovent, uti sunt *nitr. depur., tart. vitriolat., regul. antim. medic. & cinnab. antim.*



*mon.* adjecta pauca quantitate sulph. vivi cum *infusis thei-*  
*formibus* in forma pulveris adhibita, post quorum usum  
 ut plurimum, quando malum est recens, recrementa ista  
 iterum excernuntur & in cute tamquam parte ignobiliori  
 sedem occupant. Quando vero malum est inveteratum,  
 medicus in cura plerumque oleum & operam perdit, &  
 æger diem obit supremum. Febris lenta quando in atro-  
 phia est præsens, ab omnibus calidis remediis est abstin-  
 dum, ne medicus febrem augeat, & interdum etiam æ-  
 grotum necet. Profunt autem *nitr. depur.*, *conchæ citra-*  
*tæ* & *materia perlata Krügeri* vel *antimon. diaphoret.* po-  
 tus non debet esse concentratus, spissus aut saturatus, sed  
 aquosus. Ne limites dissertationis transgrediar, heic me-  
 æ impono colophonem. Plura equidem fateor adjici po-  
 tuissent, sed veniam impetraturum me spero quum omnia,  
 quæ plurimi amplis litterarum monumentis consignarunt,  
 huc transcribere duxerim haud consultum. DEO inte-  
 rim O. M. pro benignissime suppeditatis ad hunc labo-  
 rem viribus gratias ago, quas possum concipere,  
 maximas, submissus rogans, velit & in poste-  
 rum meis adesse conaminibus, quo o-  
 mnia cedant in summi Nominis Sui  
 gloriam & proximi mei ægro-  
 tantis solamen.



\* \* \* \* \*

**P***Rima* TIBI diuae sophies, *doctissime* BOELI,  
 Florentes campos visere *cura* fuit:  
*Primum* letiferos *animae* cognoscere morbos  
 Ac eius placuit pharmaca nosse sacra.  
*Hippocratis* doctas post tractans sedulus artes  
*Corpora morborum* vi releuare studes.  
 Sic prudenter agis. Sic *mentis cura* labores  
 Ac DEVS est orsus sorte fauente tuos.  
 Post *pietatis amor* tua fausto fidere coepta  
*Rexit*, sperato composuitque modo.  
 Hinc *dudum meritos*, quos nunc assumis, honores  
 Ornabit varia prosperitate DEVS;  
 Ac quia sparsisti studiorum *semina large*,  
 TE nunc fortunæ *messis opima* manet:  
 Nil opus est igitur *votorum* firmate longo.  
*Qui large seruit*, largiter ille metet.

Hisce verbis *Clariss. ac Doctissimo Domino Can-*  
*didato* Matruei ac fautori suo insigniter co-  
 lendo eruditionis eximium specimen ac ca-  
 pienda laborum praemia ex animo gratulari  
 simulque faustos in medicae artis vsu succes-  
 sus adprecari absens voluit

F. A. F. ROTH,

Bombecca-Palaeo-March. S. Theol. C.

---

**S***Ic, docte BOELI, delictum meae*  
*Amorque mentis*, sic placuit TIBI  
 Tandem graui *dudum labore*  
*Praemia sumere comparata!*

Sic



Sic *mitra* tandem *purpureo* tua  
Cinget *coruscans* *tegmine* *tempora*!  
Ast *absque doctrina brabeum*  
Non *cupis eximie probata*.  
Verum *sagaci* *perspicias* *acriter*  
Cura & *libello doctius explicas*  
*Infantis* *artus*, quae *tenellos*  
Occupat *attenuitque, tabem*.  
*Recte*. *Salubri* *tramite* *permeas*  
*Chironis* *artem*: *corpora languida*  
*Infantibus* *sanare primum*  
*Sollicitus merito* *fui*sti.  
Nam *tardioris* *quo modo protrahet*  
*Aetatis* *annos* *vel Podalirius*,  
*Infantiles* *nisi dolores*  
*Ante* *leuare truces* *studebit*?  
Quae, *quum scienter* *praestiteris*, *tuis*  
*Perdocte BOELI*, *coeptibus* *adiicit*  
*Nunc ipsa* *calculos Hygea*  
*Omnia* *multaque fausta* *pandit*.  
*Absens fidei* *gratulor hinc TIBI*  
*Partos honores pectore*, *comprecans*  
*Voto tuis caeleste* *factis*  
*Auxilium medici supremi*.  
*Hoc* *semper ausus* *prosperet ac beet*!  
*Hoc TE* *virenti robore nutriat*!  
Ac *sicut a multis malignam*  
*Corporibus maciem* *repellis*,  
Sic, *opto*, *curas, tabificas* *idem*  
A *TE* *repellat*! *sic procul arceat*  
*Ne fasta fata*, *ne dolore*  
*Turbida mens TIBI maceretur*!

Sic



Sic largiori munere gratiae

Beante vires iureo<sup>φ</sup>ia tuas

Firmet, nec <sup>α</sup>ρεο<sup>φ</sup>os TIBI sit,

Atropos ante diem timori.

Clariss. ac eleganter docto Domino BOELIO,

fautori proprio cognationis atque in-

genuae amicitiae nexu sibi coniunctis-

fimo, conatus promeritosque honores

sincera mente congratulans, exiguos

hosce numeros, in bene cupientis ac

deditissimae voluntatis quaecunque

documentum, scriptos voluit locorum

intercapedine non animo absens

GOTTFR. CHRISTIAN. ROTH,

Bombecca-Palao-March. S. Theol. Cand.

**S**o muß ich Werther Freund, an diesem Tage sehen,  
Dich an demselben Ort der Candidaten stehen,  
Wo Tugend, Müß und Fleiß der Ehre werth geschäft,  
Und man den Doctor-Hut auf Ihren Scheitel setzt.  
Wer sollte Dir hierzu nicht freudig gratuliren,  
Und Deinen Ehren-Tag mit Lob-Gedichten zieren?  
Ich komme auch herzu doch ohne Schmeicheleyen,  
Und will mit anderen darüber mich erfreuen.  
Du nimst mit großem Recht den Ehren-Titel an,  
Der Dein erwünschtes Wohl genug befördern kan.  
Ichova sey Dein Schutz und Schirm auf allen Wegen,  
Und setze Deinen Stand der Deinen stets zum Seegen.

Hiermit wolte dem Herrn Candidato ergebens  
gratuliren als ein specialer Laudes-Mann und  
guter Freund

Iohannes Israel Küderling,

Derenburgo-Halberstadiensis S. S. Theol. Stud.